

ԼԻԼԻԹ ԳՐԻԳՈՐՅԱՆ

ԵԿԵՂԵՑԻՆԵՐԻ ՄԻԱԿՈՐՄԱՆ ԽՆԴԻՐԸ
ՖԵՐՐԱՐԱ -ՖԼՈՐԵՆՑԻԱՅԻ ԺՈՂՈՎՈՒՄ ԵՎ ՀԱՅՈՑ
ԵԿԵՂԵՑԻՆ

Քրիստոնեության ընդունումից հետո հրավիրվել են ժողովներ՝ քրիստոնյա երկրների մասնակցությամբ: Այդ տիեզերական ժողովները հաճախ հրավիրվել են հռոմեակաթուղիական եկեղեցու կողմից՝ դավանական խնդիրներ քննարկելու համար: Մինչև 1870թ. Վատիկանի ժողովը հրավիրվել է ավելի քան 20 ժողովներ, որոնցից յուրաքանչյուրը որոշակի նպատակ է հետապնդել: Հայաստանը որպես քրիստոնեական երկիր մասնակցել է դրանցից մի քանիսին, սակայն հայոց եկեղեցին ընդունում է առաջին 3 ժողովների որոշումները . Նիկեա (325թ.), Կ.Պոլիս (381թ.), Եփեսոս (431թ.) և տիեզերական ուժ ու հեղինակություն չի տալիս մյուս ժողովներին, այդ թվում և Ֆերրարա-Ֆլորենցիայի ժողովին:

Հայոց եկեղեցին 15-րդ դարում շատ ծանր վիճակում էր. 1375թ. վերացել էր Կիլիկիայի թագավորությունը, 1377-1432թթ. իրար հաջորդեցին 6 կաթողիկոսներ, չկար միասնական կաթողիկոսական աթոռ, եկեղեցին բաժանված էր: Այս ժամանակ կաթողիկոս դարձավ Կոստանդին Զ Վահկացին (1429-1439 թթ.), ում կաթողիկոսության ժամանակ տեղի ունեցավ Ֆերրարա-Ֆլորենցիայի ժողովը:¹

13-րդ դարի երկրորդ կեսից պապական իշխանությունը անկում էր ապրում: Կաթոլիկական եկեղեցին բաժանվել էր երկու մասի. հռոմում և Ավինիոնում միաժամանակ իշխում էին երկու պապեր. առաջացել էր այսպես կոչված Արևմտյան հերձվածքը: Դա առաջացրեց կաթոլիկական եկեղեցու դժգոհությունը և նրա ներկայացուցիչները պահանջում էին, որ պապական իշխանությունը գտնվի եկեղեցական ժողովների հսկողության տակ: Այդ խնդրի հետ կապված 1311թ. սկսած շուրջ 40 տարի գումարվեցին ժողովներ, ինչը վկայում էր, որ պապական իշխանությունը կորցրել էր իր ուժն ու հեղինակությունը:²

¹ Ս. Օրմանեան, Հայոց եկեղեցին և յուր պատմությունը, Կ.Պոլիս, 1912, էջ 101:

² Б.Я. Рамм, Папство и Русь в X-XV вв., М., 1959, с. 221.

ժողովը հրավիրվել է Եվգենիոս Դ.(1431-1437 թթ.) պապի կողմից: Նա ձգտում էր իշխանության և փողի ու չէր հաշտվում Բագելի ժողովի այն որոշման հետ, որ ժողովականների իշխանությունը բարձր է պապի իշխանությունից: Այդ նպատակով նա որոշեց գումարել ժողով և հաստատել, որ պապական իշխանությունը բարձր է բոլոր ժողովականների որոշումներից.ինչպես նաև պապական աթոռին ենթարկել Արևելքի եկեղեցին:³ Այս ժամանակ էր, որ պապին օգնության խնդրանքով դիմեց բյուզանդական կայսր Յովհաննես Ը Պալեոլոգոսը(1425-1448 թթ.) և Եվգենիոս Դ պապին առաջարկեց Կ.Պոլսում գումարել միութենական ժողով, իսկ պապը դա համարեց Բագելի ժողովը ցրելու լավագույն միջոց և հավանություն տվեց:

Սեզ համար կարևոր է այս ժողովը այն պատճառով, որ հաճախ դրանով փորձել են ցույց տալ հայոց եկեղեցու միությունը հռոմեակաթուղիական եկեղեցուն:

1434թ. Եվգենիոսը, որոշելով գումարել ժողով, թուղթ հղեց Յովհ. Պալեոլոգոս կայսրին, Կ.Պոլսի Յովսեփ պատրիարքին: Չգտելով միավորել արևելյան եկեղեցին՝ թուղթ գրեց նաև հայոց կաթողիկոս Կոստանդին Վահկացուն և Եսայի արքեպիսկոպոսի միջոցով, որը Կ.Պոլսի հայոց առաջնորդն էր, ուղարկեց կաթողիկոսին:⁴ Եսային Աբղյմսելի սարկավագի միջոցով ուղարկեց Սիս՝ Կոստանդին Վահկացուն:⁵ Պապի այդ նամակը չի պահպանվել, բայց կա Եսայիի պատասխան նամակը, որը սկսվում է հետևյալ բառերով.

«Ամենասուրբ և ամենաբերանիկ Տեառն մերում՝ Տեառն Եվգինես Քահանայապետի», որում Եսային գրում է, որ նամակը ուղարկել է կաթողիկոսին, ինչպես որ պատվիրվել էր և կարծես թե կատարյալ համաձայնություն է տալիս միությանը, թերևս կաթողիկոսը դեռ չէր պատասխանել:

Պապի նամակը 4 տարի մնաց անպատասխան.դա նշանակում էր, որ Սիս աթոռը, հայերը, կաթողիկոսը, ոչ միայն հռոմեադավան չեն, այլև միտում էլ չեն ունեցել միության: Այս ժամանակ պապի պատվիրակ Քրիստափոր Գարատանոսը գնում է Ֆլորենցիա՝ հորդորելու պապին՝ ժողովը գումարել Կ.Պոլսում, որտեղ համաձայն էր գնալ նաև հայոց կաթողիկոս Կոստանդին Զ Վահկացին: Վենետիկ հասնելով նա թուղթ է գրում Քահանայապետին, որում հայերի մասին գրում է, որ «մեծ հույս կա նրանց դարձին, ինչպես որ հունաց միությունը քո ձեռքում է, նույնը պետք է լինի հայերի հետ»: Սակայն պապը որոշում է ժողովը գումարել Իտալիայի Ֆերրարա քաղաքում:

³ К. Н. Ивановъ, Средневековое папство и его представители. СПб, 1915, с. 298-300.

⁴ Ս. Օրմանեան, Ազգապատում, հ. Բ. Բեյրութ 1960. էջ-2070:

⁵ Ժե դարի հայերեն ձեռագրերի հիշատակարաններ, Լ. Խաչիկյան, Երևան 1955. էջ 464:

1438թ. հունվարի 1-ին եվգենիոս Դ-ն հատուկ կոնդակով Բագելի ժողովը լուծարված է հռչակում: Ապրիլի 9-ին Իտալիայի Ֆերրարա քաղաքում պապը բացում է ժողովը, որտեղ պետք է որոշվեր եկեղեցիների միության հարցը: Ժողովին մասնակցում էին հունական կայսր Դովհաննես Ը Պալեոլոգոսը, Կ.Պոլսի Դավսեփ պատրիարքը, ավելի ուշ գալիս են նաև ռուսական եկեղեցու ներկայացուցիչները:⁶ Հույների համար այս միությունը քաղաքական նպատակ ուներ: Իսկ պապը նաև նպատակ ուներ եկեղեցիների միությունով պապական իշխանությանը ենթարկել Արևելքի եկեղեցին՝ առաջին հերթին ռուսական եկեղեցին:⁷

Տարածված ժանտախտի պատճառով ժողովը տեղափոխվում է Ֆլորենցիա: Պապը առանձին պատգամավորություն ուղարկեց հայոց կաթողիկոսին հրավիրելու համար, որը եկավ Կաֆա:⁸ Այստեղ կար մեծ թվով հայ բնակչություն՝ ճենովացիների հովանավորության ներքո: Կաֆայում, որպես կաթողիկոսի երեսփոխան, Սարգիս վարդապետը, որը ս.Անտոնի վանքի առաջնորդն էր, մեծ դերակատարում ունեցավ Տիեզերական ժողովին հայերի մասնակցության մեջ:⁹

Հետաքրքիր է, որ պապի հրավերը ուղարկվեց ոչ թե Սիս, այլ Կաֆա, կարծես թե հայության կենտրոնը այստեղ էր: Պապի նվիրակը հասնում է Կաֆա և տեղի ճենովայի հյուպատոս Իմբերիան մայիսի 12-ին Կաֆայի կողմից տիեզերական ժողով ներկայացուցիչ ուղարկելու պահանջ է ներկայացնում: Խորհրդակցական ժողովը տեղի է ունենում հյուպատոսի սենյակում, որին մասնակցում էր Կաֆայի հայոց արքեպիսկոպոս Սաղաքիան: Հյուպատոսը առաջարկում էր «առաքել ի Գենուս կամ առ ամենասուրբ տէր մեր Զահանյապետ կամ առ Սինհողոսն հրեշտակ մի, իբրև դեսպան նոցա յօգուտ ամենայն քրիստոնեիք»: Հայերը խնդրում են, որ իրենց 3 ամիս ժամանակ տան, որ կաթողիկոսի համաձայնությունը ստանան:¹⁰

Սակայն կաթողիկոսը հրաժարվեց գնալ և իր փոխարեն երեսփոխան ընտրեց Դովակիմ եպիսկոպոս Բերիային, Սարգիս, Սարկոս ու Թովմաս վարդապետներին:¹¹ Նրանց տվեց իր պատասխան թուղթը, որում ասվում էր, որ ինքը լիազորում է պատգամավորներին իր փոխարեն «երթան Սինհող,

⁶ Ф.И. Успенский, История Византийской империи, т. III, М.-Л., 1948, с. 771.

⁷ Б.Я. Рамм, указ. соч., с. 225.

⁸ Մ. Չամչյան, Հայոց պատմություն, հ. Գ., Երևան 1984, էջ 473-474:

⁹ Ժե դարի Հիշատակարաններ, էջ 414:

¹⁰ Հ. Գ. Գալենքեարեան, Կ. Պոլսոյ Պէտրոլոսի հայոց գերեզմանատունը և կաթողիկէ հայերու տապալանագիրներ, Հանդես ամսօրյա, Վիեննա, 1911, 1-12, հուլիս- օգոստոս, էջ 464:

¹¹ Հ.Ս. Կոզեան, Հայոց եկեղեցին, Բեյրութ 1961, էջ 486:

Հոգին Սուրբ լուսատու ըլլայ իրենց, և Հոգւոյն Սրբոյ զօրութեամբ ինչպես որ Ս.Սեղբեստրոս և Ս.Գրիգոր եղան միաբան, նույնպես Աստուած միաբանէ զձեզ ի խաղաղութեան, ի սեր և ի միութեան, ինչպես Կոստադինոս ինքնակալ և Տրդատ ինքնակալ միաբանք և դաշնակիցք ընդ միմեանս եղան, ըստ նմի օրինակի և դուք միւ անգամ հաստատեսցիք զգործս նոցա ի միութիւն, և մեք միտագոյնք ենք ի գործս ինքնքկալացս այսոցիկ և այժմ՝ որպէս և զիարդ լուսաւորեսցէ սուրբ Հոգի գտուր Սինհողոսն, այնմ պատրաստ ենք հնազանդել»։¹² Այս խոսքերը հոգևոր սիրուց ավել բան չեն նշանակում։ Իսկ հյուպատոսին ուղղված թղթում գրում է. «Սուրբ Հոգին թող լուսավորե անոնց միտքը, այնպէս թող զօրօեն, որպէս զի սեր և միութիւն և եղբայրութիւն ըլլայ ի մեք քրիստոնէից», կաթողիկոսը ոչ հավատի, ոչ պապի իշխանութեան, ոչ հռոմէադավանոթյուն ընդունելու մասին չի խոսում։ Պապին ուղղված գիր կամ պատիվ ու հարգանք կամ հպատակութիւն հայտնող հայտարարութիւն չի գրում։¹³

Այսպէս կազմվեց 4 հոգւոց բաղկացած պատգամավորութիւնը, որի ղեկավար սակայն նշանակվեց քահանայապետի փոխանորդ Ֆրա Հակոբը, առանց որի հայերը չէին կարող ներկայանալ քահանայապետին։ Այսպիսով, միաբանութիւն կոչված ժողովին ուղարկված հայոց պատվիրակութիւնը ղեկավարում էր լատին կրօնավորը և նա էլ որոշումներ էր ընդունելու։ 1438թ. դեկտ. 1-ին այս կիսալատին, կիսահայ պատվիրակութիւնը պապին ուղղված նամակը վերցնելով, ճանապարհվեց Կ.Պոլիս որ կայսեր հետ գնան, բայց կայսրը արդեն մեկնել էր և ստիպված մենակ գնացին Ֆլորենցիա։¹⁴

Այս ժողովին մասնակցող հույները եկել էին օսմանյան վերահաս վտանգից ազատվելու համար օգնութիւն ստանալու, իսկ պապը ծգտում էր իր իշխանութիւնը տարածել Արևելքում և իր անձնական թշնամիների հանդեպ առավելութեան հասնել։¹⁵

1439թ. փետրվարի 26-ին առաջին նիստը գումարվեց, ուր քննարկվեց դավանական խնդիրներ, բայց պապական իշխանութեան կետը ծանր ընդդիմութեան բախվեց։ Հույները չէին ուզում հաստատել, որ Հռոմի աթոռը առաջինն է, իսկ դա պապի գլխավոր նպատակն էր. քանի որ պապը այդպիսով գերիշխանութիւն ձեռք կբերեր բոլոր եկեղեցիների հանդեպ։ Հունիսի 12-ին մահա-

¹² Ա.Վ.Պալմեան, Պատմութիւն կաթողիկէ վարդապետութեան ի Հայս և միութեան Սոցա ընդ հռոմէական եկեղեցիոյ ի Ֆլորենտեան Սինհողոսի, Վիեննա, 1878, էջ 86-89։

¹³ Ս. Օրմանեան, Ազգայաշատում, էջ 2080-2081։

¹⁴ Հ.Ն.Ալկինյան, Սարգիս վարդապետ Կաֆայի, Հանդես ամսօրյա, Վիեննա, 1935, էջ 428-30։

¹⁵ Գործք պատրիարքական Սինհողոսի կաթողիկէ հայոց, Կ.Պոլիս, 1910, էջ 26։

ցավ Յովսեփ պատրիարքը և հույները պատրաստվում էին վերադառնալ, բայց պապն ու կայսրը ձգտում էին իրագործել իրենց ծրագրերը:

Յուլիսի 6-ին պապն ու կայսրը միութենական վճիռ ստորագրեցին և հանդիսապես հրատարակեցին Ֆլորենցիայի մայր եկեղեցում: Պապը իր կոնդակը հաստատում էր կայսեր հավանությանը և արևելյան պատրիարքների կողմից:¹⁶ Բացատրվում էր, որ հռոմեա-կաթոլիկական ի հօրէ և յորդույ և օրթոդոքս ի Յորէ Որդու բանաձևերը մույն իմաստը ունեն և ընդունում իբր ի միոյ սկզբան է վարդապետությունը: Պատարագի և մաքրարանի մասին յուրաքանչյուր եկեղեցի իր սովորույթն էր պահում: Այսպիսով պապը կարծես թե հասել էր իր նպատակներին, կայսրը կարծում էր ապահովել է իր կայսրությունը և արդյունք էր պահանջում, սակայն իրականում պապը չունեւ այն ազդեցությունը, որ եվրոպայի բանակները շարժեր Օսմանյան տիրապետության դեմ: Յուսախաբ կայսրը բավական երկար մնաց Ֆլորենցիայում՝ փորձելով ինչ որ կերպ իրագործել իր ծրագիրը, բայց որևէ արդյունքի չհասնելով, օգոստոսի 26-ին մեկնում է Կ.Պոլիս.միայն 2 հույն եպիսկոպոս են մնում, որոնք հռոմեադավան էին:¹⁷

Օգոստոսի 25-ին Ֆլորենցիա հասավ հայոց պատվիրակությունը, երբ տիեզերական ժողովը վաղուց ավարտվել էր: Սակայն շատ եպիսկոպոսներ դեռ այնտեղ էին և եվգենիոսը կազմեց մասնաժողով և հրամայեց մի քանի գիտուն մարդկանց խոսել հայոց պատվիրակների հետ և ներկայացնել ժողովի որոշումները: Հայ պատգամավորները ծանոթացան ժողովի հավատի և բարեկարգության մասին տված վճիռներին, ընդունեցին այն կետերը որոնց չուրջ միաբանվել էին հռոմեակաթոլիկական և օրթոդոքս եկեղեցիները: 1439թ. նոյեմբերի 22-ին, հայերի հասնելուց 3 ամիս հետո, տեղի ունեցավ այսպես կոչված միությունը: Եվգենիոսը իր անունով կոնդակ հրատարակեց, հասարակ կոնդակների ձևով, որը ոչ ժողովական կանոնի ձև ուներ և ոչ էլ նախապես նշված էին պատգամավորների ստորագրությունները: Այս պատճառով այն սովորաբար անվանում են Հրահանգ առ Հայս:¹⁸ Կոնդակը սկսվում է հետևյալ բառերով. «Յնծացեք առ Աստված, զի օգնական է մեր, աղաղակեցեք առ Աստված Հակոբայ ամենեքին, որք ընդ ամենայն տեղիս կոչեցեալքդ էք Զրիստոնեայք»: Կոնդակի սկզբում նշվում է, որ 900 տարի բաժանված Հայոց եկեղեցին Հռոմի հետ է միանում: Դա նշանակում էր, որ մինչ այդ միություն չի եղել, ինչը հերքում է մինչ այդ տեղի ունեցած տիեզերական ժողովները: Ապա

¹⁶ Մ. Չամչյան, Նշվաշի. էջ 479:

¹⁷ Մ. Օրմանեան, Ազգապատում, էջ 2075:

¹⁸ Անդ, էջ 110:

պապը նշում է, որ հայերը անծուկ փափագով ուղարկեցին պատգամավորներ, ովքեր բազում դժվարություններով եկան՝ ցանկանալով հաստատել եկեղեցիների միություն: Մինչդեռ եկողները կես հայ կես լատին էին. որոնց ղեկավարում էին լատինները և ոչ էլ ուղարկված էին Սսի կաթողիկոսի կողմից: Ապա առաջարկեց ընդունել միության բոլոր կետերը.

1.Քրիստոսի և Հոգւոյն Սրբոյ աստուածութիւնը երեք ժողովների համեմատ. «Մի Աստված,հայր ամենակալ, արարիչ երկնի և երկրի, և ի մի Տեր Յիսուս Քրիստոս յորդի Աստծոյ միածին և ի Հօրե ծնեալ նախքան զամենայն յաւիտեանս»: 2.Քրիստոսի 2 բնության վարդապետությունը: 3. երկու կամաց վարդապետությունը: 4.Քանի որ հայոց եկեղեցին ընդունում էր առաջին երեք ժողովները միայն, ապա այժմ ընդունում էր Քաղկեդոնի ժողովի և Հռոմի կողմից գումարած բոլոր ժողովները: 5.Ընդունվում էր եկեղեցու 7 խորհուրդները՝ Մկրտություն, Դրոշմ, Հաղորդություն, Ապաշխարություն,Վերջին Օծում, Կարգ և Ամուսնություն: Բացի վերջին Օծումից, մյուս 6-ը վաղուց գործածվում էր հայոց եկեղեցու կողմից: 1.Մկրտություն-պահանջվում էր ընդունել էս մկրտեմ զքեզ ձեռ, բայց և Մկրտի ծառայս ձեռ չի մերժվում: 2.Դրոշմի մեջ իրավունքը վերապահվում է բացառապես եպիսկոպոսին, բայց հայոց եկեղեցում Դրոշմը կատարում էր քահանան:¹⁹ 3.Հաղորդություն-նշանակում է ժողովրդի միավորում Քրիստոսի հետ. քանզի ջուր նշանակում է ժողովուրդ:Եվ քանի որ զինին Քրիստոսի արյունն է,ապա խառնելով ջուրն ու զինին ժողովուրդը միանում է Քրիստոսին: 4.Ապաշխարություն կամ խոստովանություն. կատարվում է քահանայի առջև և նա արծակում է ապաշխարողին մեղքերից: 5.Վերջին Օծում: 6. Կարգ կամ Չեռնադրություն: 7.Ամուսնություն,որը նշանակում է երեք բան. որդեծնություն և զավակների կրթություն, հավատարմություն, որ պետք է պահեն ամուսինները, անբաժանություն, քանի որ եկեղեցում կատարված ամուսնությունը մշտական է:²⁰

Այնուհետև հայերի վրա է տարածում հույների հետ հուլիսի 6-ին հաստատած միությունը՝ նշելով, որ բաժանված արևմտյան և արևելյան եկեղեցին նորոգվեց, խաղաղություն և միաբանություն հաստատվեց: Սահմանվեց, որ սուրբ աթոռն ու Հռոմի Քահանայապետը ունի զլիսավորություն և եվզեցնիսը Քրիստոսի ճշմարիտ փոխանորդն է երկրի վրա: Ապա պարտադրվում էր,որ հայերը ևս տոնեն Ավետումը, Հովհաննեսի ծնունդը, Քրիստոսի ծնունդն ու հայտնությունը, Տեառնընդառաջը: Հայտարարվեց, որ հայ պատգամավորները

¹⁹ Ա.Վ.Պալճեան, Նշվ.աշխ., էջ 114-116:

²⁰ Գործք պատրիարքական Սինհոդոսի, էջ 39:

հայոց կաթողիկոսի անունով հաստատեցին այդ կետերը՝ ընդունելով կամ մերժելով այն, ինչ որ Հռոմեակաթոլիկ եկեղեցին կընդունի կամ կմերժի:

Հայ պատգամավորները, հետևելով լատին պատգամավորներին, ստորագրեցին Եվգենիոսի կոնդակը, ոմանք ստորագրեցին հանուն մեր և հանուն մեծի կաթողիկոսին մերոյ և Ամենայն հայոց: Ստորագրել են նաև Սարգիս և Թովմաս վարդապետները. «Արդ ես Սարգիս վարդապետս, որ եմ դեսպան հայոց կաթողիկոսին, և աթոռակալ Կաֆայի, այս սահմանս գրեցաւ ձեռամբ իմով»: «Ես Թովմա վարդապետս վկայ եմ, և դեսպան այս բանիս ձեռամբ իմով գրեցի»:²¹ Սա պաշտոնական միութիւն էր Հայոց եկեղեցու և Հռոմի Պետրոսյան աթոռի միջև:

Երբ Եվգենիոսը տվեց այս կոնդակը և որում նշվում էր, որ հայ պատգամավորները կաթողիկոսի անունից են որոշումներ ընդունում, հայոց կաթողիկոս Կոստանդին Զ Վահկացին արդեն մահացել էր. 1439թ. ապրիլի 20-ին, այսինքն մինչ Ֆլորենցիայի ժողովը և հայոց պատվիրակության Ֆլորենցիա հասնելը և այն ինչ կատարվում էր կաթողիկոսի անունով, վավերական հիմք չուներ: Բացի միութեան վերաբերյալ Կոնդակից, պապը 1439թ. դեկտեմբերի 15-ին Կոստանդին կաթողիկոսին ուղղված թուղթ է գրում, այն մասին որ միութիւնը կատարված է, իր ուղարկած պատգամավորները ետ են դառնում: Սա փաստորեն հանգուցյալին ողղված գիր էր: Մեկ գիր էլ ուղարկում է Կաֆա և լատիններին հրահանգում էր համերաշխ ապրել հայերի հետ:²² Պապը պատգամավորներին տվեց մեծ ընծաներ, մասնավորապես Սարգիս վարդապետին տվեց չքնաղազարդ մի խաչ, որում կար Քրիստոսի խաչափայտից մասնիկ:²³

Պատգամավորները, վերցնելով Եվգենիոսի կոնդակը և ընծաները, ճանապարհվեցին Հայաստան: Նրանք պետք է կաթողիկոսին ողղված նամակն ու միութեան կոնդակը տանեին Սիս՝ հանձնելու հայոց կաթողիկոսին, սակայն այդպիսի բան չեղավ: Նրանք գնացին Կաֆա՝ կատարված գործերի մասին տեղեկացնելու Կաֆայի ճեմովացի կառավարչին: Դա հաստատում է, որ նրանք միայն անունով էին հայոց կաթողիկոսի ուղարկած պատգամավորները, իրականում նրանք ճեմովացի կառավարչի պատգամավորներն էին: Սարգիս վարդապետը մնաց Կաֆայում, ս. Անտոնի վանքում և սկսեց քարոզել միութեան գաղափարները: Հայտնի չէ թե երբ և ինչպես է այս կոնդակը հասցվել Սիս: Սի բան ստույգ է, որ Հայաստանում այս միութեան ազդեցությունը չի հիշա-

²¹ Մ. Օրմանեան, Ազգապատում, էջ 2085:

²² Ա. Վ. Պալեան, Նշվաշխ., էջ 141:

²³ Մ. Չամչյան, Նշվաշխ., էջ 481:

տակվում:²⁴ Այս միությունը չի հաստատվել կաթողիկոսի կողմից. Ինչպես տեսանք Կոստանդին Վահկացին մահացել էր, նրանից հետո կաթողիկոս դարձավ Գրիգոր Թ. Մուսաբեգյանը (1439-1441 թթ.): Ապա 1441թ. էջմիածնում հրավիրվեց ազգային ընդհանուր ժողով և կաթողիկոսական աթոռը հաստատվեց էջմիածնում, կաթողիկոս ընտրվեց Կիրակոս Վիրապեցին (1441-1443 թթ.): Եվ կրկին միության հաստատման վերաբերյալ տեղեկություն չկա: Միայն 150-200 տարի հետո հիշատակվում է, որ հայերը պահպանում են այս միությունը, ինչի մասին սակայն վկայություն չկա: Եթե այս միությունը կայացել է, ապա արդյոք Կոստանդին Զ Վահկացին ինքնուրույն, առանց ազգային ժողով գումարելու, առանց ազգի համաձայնության կարող էր հայոց եկեղեցու դրությունը փոխել:²⁵

Ընդհանուր հայտարարի բերելով շարադրվածը, կարելի է նշել, որ հիշյալ կոնդակով չի կարող հաստատվել միություն հայոց և հռոմեական եկեղեցիների միջև: Այս միությունը ավելի շուտ վերաբերվում էր Կաֆայի հայերին և ոչ ամբողջ հայությանը: Հայոց պատվիրակությունը բուն ժողովին չի մասնակցել, ընդամենը այդ ժողովում ընդունված որոշումների վերաբերյալ կոնդակ էր գրվել: Ուստի կարող ենք եզրակացնել, որ Ֆերրարա-Ֆլորենցիայի ժողովը օրինական հիմք չունի և դրանով չէր կարող միություն հաստատվել հայոց և հռոմեակաթոլիկ եկեղեցիների միջև:

²⁴ Ժ դարի հայերեն ձեռագրերի հիշատակարաններ, էջ 629:

²⁵ Հանդես ամսօրյա, 1935թ., էջ 466: